

Powšitkowne WOZJEWJENJA

njedźelu, 27. decembra 2015

W Róžeńće stajnje sobotu rano Boža mša

Wot spočatka noweho lěta budžeja stajnje sobotu rano we 8 hodź. na hnadownym městnje w Róžeńće kemše. Na nich budže so wo smilnosć za lud a kraj modlić. Regularne rańše kemše w serbskich wosadach nimo w klóštrje Marijinej Hwězdze tohodla hižo njebudu. Wšitcy su nětko w Lěće smilnosće do Różanta prošeni.

Koparski turněr wo pokal TCM

Towarstwo Cyrila a Metoda z.t. (TCM) zarjaduje sobotu, 16. januara, w 14.00 hodź. w Chróšćanskej „Jednoće“ halowy koparski turněr wo pokal TCM. Přeprošene su wosadne a wjesne mustwa młodźiny kaž tež mustwa sportowych jednotkow. Kóžde mustwo měło z wosom hrajerjemi nastupić. Hrać budže so z třomi koparjemi a wrotarjom. Přizjewić měli so mustwa hač do njedźele, 10. januara, pola předsydy TCM Jurja Špitanka, telefonowe čisło (03 57 96) 9 63 47 abo mobilnje pod (01 72) 7 97 38 29.

Kubłanskej dnjej nětko we Worklecach

Přemało přizjewjenjow dla budžetej kubłanskej dnjej pod hesłom „Štó je mój bliši?“ nětko pjatk a sobotu, 8. a 9. januara, w Don Boskowym domje we Worklecach, a nic kaž dotal planowane w Kopańcach. Přeprošujemy wutrobne młodostnych wot 14 lět. Přizjewjenja přijimuju so hač do pónđzele, 28. decembra, w Dekanatnym dušepastyrstwie we Worklecach pod telefonowym čisłom 03 57 96 (9 55 95), z mailku na don.boskowy-dom@t-online.de abo přez facebookowu stronu dekanatneje młodźiny.

Wjeselimy so na Was!

Leńka a Lucija, młodźinskej referentce, a dekanatny kružk

Za Swětowe zetkanje młodźiny so přizjewić

Serbscy młodostni podadza so klětu zhromadnje na Swětowe zetkanje młodźiny do Krakowa. Tute wotměje so wot 20. do 31. julija. Přizjewić měli so k tomu najpozdžišo hač do 20. januara 2016 z formularom. Tute su w cyrkwjach wupožžene. Samsny formular je pod www.posol.de wozjewjeny. Wšitke nadrobne informacije su na tutych flajerach tohorunja podate.

Hodowny hudźbny nyšpor w Róžeńće

Chór Lipa wuhotuje njedźelu, 27. hodownika, w 17 hodź. w Róžeńčanskej cyrkwi hodowny hudźbny nyšpor. Na nim zaklinča serbske hodowne spěwy kaž tež wurězki z liturgije op. 41 P. I. Čajkowskeho. Zběrka při durjach budže za hnadownu cyrkej. Wšitcy lubowarjo hodownych zynkow su wutrobne přeprošeni.

Silwester hudźbny nyšpor w Baćonju

„Do Božeje smilnosće so podać“ chcemy so na hudźbnym nyšporje štwórtk, 31. hodownika, w 19 hodź. w Baćońskej cyrkwi. Wo hudźbne wobrubjenje postara so chór přiwuznych młodych spěwarkow a spěwarjow wokoło Jadwigi Kaulfürstoweje. K parkowanju awtow přewostaji swójba Donatec swój twarski dwór.

Baćońska wosada Jězusoweje wutroby

Hodownej koncertaj w Radworju

Swojej hodownej koncertaj wuhotuje chór Meja wutoru, 29. decembra, dwójce w Radworskim hosćencu „Meja“. Jako hosći su sej Mejenjo młodźinski chór Ralbičanskeje wosady přeprošli. W lětušim programje su hodowne spěwy runje tak zapřijate kaž zymske, wšelake „stare“ a tohorunja moderne pěsnje. Prěni koncert w swětle swěčkow budže w 16.00 hodź. Swaćina so wot 15.15 hodź. poskići. Dalši koncert wuhotuje so w 19 hodź. Přizamknu so reje. Wšitcy su wutrobnje do Radworja přeprošeni.

Hodowny koncert w Chrósćicach

Tradicionelny hodowny koncert Chróšćanskeho cyrkwinskeho chóra z instrumentalistami a solistami wotměje so njedźelu, 3. januara, w 14 hodź. w tamnišej wosadnej cyrkwi. Zaklinči mjez druhim „Magnificat“ wot Antonija Vivaldija. Wšitcy su wutrobnje do Chrósćic přeprošeni.

W zymskich prózdninach do Schmiedeberga

Dekanatne dušepastyrstwo přeprošuje šulerki a šulerjow 4. a 5. lětnika w druhim tydženju zymskich prózdnin wot pónđzele do pjatka, 15. do 19. februara, na zhromadne dny do Winfriedoweho domu w Schmiedebergu. Zajimcy njech so prošu hač do wutory, 26. januara, pod telefonowym čisłom 03 57 96 (8 87 07) we Worklecach přizjewja. Tam dóstanu dalše informacije.